

ALAHADY FAHA 33 MANDAVANTAONA - A



AHAZOANA HASAMBARANA NY MIASA AMIN-KERIM-PO

Ry Kristianina havana, efa voalazantsika tamin'ny alahady lasa teo fa ankoatry volana novambra volana ahatsiarovana ireo havantsika nialoha lalana antsika dia efa mamaramparana ny taona litorjika isika ka tsy mahagaga raha ireo vakiteny atolotry ny Eglizy amintsika dia entina hanampy antsika handinika ny fiafaran'ny fiainantsika satria isika izay nohariana dia misy fiafarany hoy isika tamin'ny farany. Noho izany hanomana an'izany farany izany no irin'ny Eglizy ampianarina antsika amin'ny alalan'ireo vakiteny arosomy amintsika amin'izao Alahady faha-33 mandavantaona izao mba hanampy antsika bebe kokoa ho Kristy mpiara-belona amin'ireo manodidina antsika, mba ho EOY tokoa isika ho EGLIZY VELONA VELOMIN'NY BATEMY MIOMBONA MIARA-DALANA MANDRAY AN-TANANA IRAHINA HO MISIONERA HO TABERNAKLA. Aoka hazava amintsika ilay teny averimberintsika ary nolazaintsika, aoka tsy ho slogan fa tena iainana : ANIO NY HO AVY FA TSY AMARAY. Arakaraky ny fiheverantsika ny fiafarana no entintsika dieny izao mamolavola ny iniany, ny anio, an'izao fiainana izao, raha mieritreritra isika fa tsy misy antenaina aorian'izao fiainana izao, izany hoe ny ho avy, dia aza gaga isika raha ny fahendren'izao tontolo izao no entintsika mamolavola ny fiainantsika andavanandro, izany hoe hanararaotra izay mandalo miserana ka mety hahazoana fahafinaretana misolo ny hasambarana isika ka tsy mahagaga raha ny fitiavan-tena, ny avonavona, ny fialonana, ny lainga, ny fihatsaram-belatsihy no filamatra mandrafitra ny fiainana. Vokany fanapotehana fanilikilihana , herisetra... no manjaka.

Vakiteny I : Ohab. 31, 10-13. 19-20. 30-31

Tononkira : Salamo 127

Vakiteny II : 1 Tes. 5, 1-6

Evanjely : Mt. 25, 14-40

Fa raha ny fiainan-ko avy izay fantatsika fa tsy fiafarana fa fidirana amin'ny tena fiainana iombonana amin'Andriamanitra kosa dia miomana isika ary izay sahady ny antitranterin'ny vakiteny tamintsika tamin'ny Alahady lasa teo raha nandinika ny virjiny adala sy ny virjiny hendry isika. Ny adala nandany ny menak'izy ireo, nandany amin'ny zavatra tsy misy antony, nandany ny fiainana tamin'ny rendrarendra mandalo ka rehefa tonga ny mpampakatra tsy nanana ny hatolotra izy ireo fa ny virjiny hendry kosa nahay nikolokolo ity fiainana ity, toy

izay taranaka mandrava sy manapotika izy ireo dia nanorina sy nandavorary ary nanatsara, izany no mahatonga antsika milaza matetika hoe niany ny ho avy fa tsy amaray.

Amin'izao Alahady faha-33 mandavantaona izao, asain'ny Eglizy isika amin'ny alalan'ireo vakiteny fa indrindra ny Evanjely hahay hampiasa ireo fanomezan'Andriamanitra amintsika dia ny taletantsika entina handavorariana ny fiainantsika sy hikorokoroantsika ity tranobe iombonantsika ity ka hifanasoa isika, hifampitsimbina, hikatsaka ny soa iombonana ary hanatsara mandrakariva ny fiainantsika ary dia hitondra antsika amin'ny hasambarana raha miasa amin-kerimpo tokoa isika amin'izay rehetra ataontsika satria izany no làlana.

Raha atao teny hafa izany ary raha mampiasa ny fitenintsika isika dia ny hoe: “manao ny asan'Andriamanitra isika, ary Andriamanitra manao ny asantsika ka hamokatra araka ny sitrak'Andriamanitra, manomana ny ho avy”....

Ny vakiteny voalohany, ny bokin'ny Ohabolana, dia manambara amintsika fa ilay vehivavy voalaza io dia tsy iza fa isika eo anatrehan'Andriamanitra izany hoe vehivavy mahery fo isika mikarakara sy mikorokoro an'ity tranobe iombonana ity mba hamokatra araky ny averimberintsika matetika hoe : “harena ny harena raha mamokatra ary mamokatra ho an'ny besinimaro”.

Ny harena voalohany dia isika olombelona, aoka àry ho harena tokoa isika ka hamokatra tsara eo amin'ny fiainantsika fa tsy hoe entanin'ny fitiavan-tena sy ny fialonana isika ka hifanaratsy sy hifanapotika fa kosa entanin'ilay fitiavana marina, ilay fihavanana irintsika tokoa, ho fihavanana sady kristianina no malagasy, ka hifampikarakara isika araky ny voalazan'ny vakiteny voalohany halala-tàna amin'ny mahantra. Maro karazana ny fahantrana mety mikiky antsika ka aoka isika hifanasoa araky ny hafatr'i Md Paoly : *“ny amin'ny andro sy ny fotoana hiavian'ny Tompo, dia tsy ilaina akory ny hanoratanay izany aminareo, satria efa mahalala marina rahateo ianareo fa ho avy toy ny mpangalatra amin'ny alina ny andron'ny Tompo.”*

Aoka ho afaka miomana an'izany isika satria isika efa mahafantatra ny ho avy araky ny hamafisin'i Md Paoly amintsika. Tsy midika izany fa mahafantatra ny zavatra hitranga amin'ny ho avy rehetra isika fa ao amin'ny Tompo isika ka ao no mandavorary an'izay ho avy izay ka tsy tampoka ho antsika izany ary tsy hampatahotra antsika satria Izy Tompo miara-dàlana amintsika mandrakariva sy maniraka antsika koa ho mpiara-dàlana amin'ny mpiara-belona amintsika ka hahatonga antsika ho Kristy ho azy ireo. Izany hoe ho fahazavana sy fanasina ka hizara ny harena lehibe ao amintsika dia ny maha-zanak'Andriamanitra antsika izay midika fa manantena sy mino ao amin'Andriamanitra isika. Tsy hipetrapetra-potsiny anefa isika satria haren'Andriamanitra ka mila miasa manitatra ny fanjakany amin'ny alalan'ny fiasana miaraka Aminy.

Izany no ampianarin'i Kristy amintsika amin'ny Evanjely androany amin'ny fanoharana mikasika ny talenta. Omen'Andriamanitra talenta isika, tsy ho talenta tahirizina fa ampiasaina entina hanasoavana ny hafa ary atao izay hampamokatra azy, ny fahaizantsika mampamokatra azy eo amin'ny fiainantsika no anambarantsika fa zanak'Andriamanitra isika ary matoky antsika Andriamanitra. Tsy hampamokatra hanangona araky ny eritreritr'izao tontolo izao fa hampamokatra hanatsara ny hafa, hitady ny soa iombonana, hampanjaka ny rariny sy ny hitsiny eo amin'ny fiainantsika, tsy hanapotika, tsy handrava sanatria fa hanorina. Mampitombo ny talenta isika raha manorina, mikolokolo an'ity tranobe iombonana ity fa indrindra ho tonga izao ny vanim-potoana hanaovantsika ny fambolena-kazo sy ny fanarahamaso an'ireny fambolena ireny. Ny talentantsika dia ho entintsika hanatsarana ny fiainantsika izay maha-zanak'Andriamanitra antsika.

Dieny izao raha voakolokolo tsara ny fiainantsika ka nahay nitantana sy nikarakara isika dia holazain'ny Tompo amintsika ny hoe : *"Tsara izany, ry mpanompo tsara sy mahatoky noho ianao nahatoky tamin'ny kely dia hataoko mpitantana ny be ianao: miaraha mifaly amin'ny tomponao"*. Izany no antenaintsika mba ho mpanompo mahatoky isika satria nahay nampiasa ireo fanomezan'Andriamanitra, mpanompo tsara isika raha nahay nanasoa ny hafa tamin'ny alalan'ireo talenta nomen'Andriamanitra antsika raha tsy izany kosa dia loza ho antsika ary dia efa fantantsika izany raha mandinika ny zava-boahary isika.

Ry Kristianina havana, aoka àry ny fitoriantsika ilay hafalian'ny Vaovao Mahafaly dia amin'ny alalan'ireo fanomezan'Andriamanitra omeny antsika, tsy hoe ho tehirizintsika tahaka ilay mpanompo ratsy, kamo voalaza amin'ny Evanjely androany, tsy hoe noho ny fahatahorana an'Andriamanitra dia tsy hihetsika isika, tsy izany fa aoka isika ho tahaka ireo mpanompo mahatoky sy tsara eo amin'ny fiainantsika ka hahatonga antsika ho Kristy mpiara-belona ka hanampy ireo mpiara-monina amintsika hahatsapa izay lalan-kombana.

Ry Jesoa Tomponay ô, ampianarinao izahay hahay hampiasa ireo fanomezana nomen'Andriamanitra anay ho entinay hanasoa ny hafa. Tsy sahy manao vy very ny aina anefa izahay matetika, manjaka loatra ny fitiavan-tena sy ny fialonana ary ny avonavona mbamin'ny fihatsaram-belatsihy, ka ireo fanomezana nomenao anay, toy izay entinay hanasoavana ny hafa dia tsy hainay ny mampiasa azy noho ny fitiavan-tena, ny tahotra sy ny hena-maso. Koa ampio àry izahay mba hiara-hiasa Aminao hanasoa ny namanay. Hanao ny asanao izahay ka lanao kosa no hanao ny asanay.

Aoka izahay tsy hatahotra hijoro amin'ny fiainanay andavanandro ho vavolombelonao tahaka an'i Victoire Rasoamanarivo sy Lucien Botovasoa hijoro mandrakariva ho famantarana sy fahazavana ary fanasina ho an'ireo manodidina anay. Omeo hery sy fahasavana izahay hahay hanorina fa tsy hoe sanatria handrava sy hanapotika. Omeo fahasahiana izahay hanorina sy hanitatra ny fanjakanao hatraiza hatraiza ho voninahitrao ho EO V MPANORINA FA TSY MPANDRAVA. Amen

Mompera Arserveka Mgr Benjamin Ramaroson